

# Gwers 32 – Y Picnic Mawr

## Nodiadau Cefndir i'r Athro

### Mathew 14: 13–21

Ceir adroddiadau am Iesu'n bwydo tyrfaoedd ar ddau achlysur, 4,000 yn nhiriogaeth y Cenedl-ddynion yn Nhyrus a Sidon, a 5000 yng Ngalyilea.

Yr oedd Iesu, meddai Mathew yn yr adran flaenorol (Mathew 14:1–12), wedi clywed newyddion drwg am farwolaeth Ioan Fedyddiwr; roedd Herod wedi mynd ar ei lw i roi i ferch Herodias (nid yw'r efengylau yn ei henwi yn Salome), beth bynnag a fynnai. Gofynnodd y ferch am ben Ioan Fedyddiwr 'A daethpwyd â'i ben ef ar ddysgl a'i roi i'r eneth' (Mathew 14:11). Neilltuodd Iesu i le unig ond ni chafodd lonydd oherwydd clywodd y bobl a phan gyrhaeddodd Iesu'r man, roedd tyrfaoedd yno'n barod, 'tua phum mil o wŷr, heblaw gwragedd a phlant'. Er ei fod wedi blino, ni allai Iesu eu hanwybyddu a thosturiodd wrthynt ac iachaodd eu cleifion. Yr oedd yn hwyr yn y dydd ac awgrymodd ei ddisgyblion i Iesu iddo danfon y dyrfa adref i brynu bwyd iddynt eu hunain.

Ar wahân i'r wyrth fwyaf un, sef Atgyfodiad Iesu, dyma'r unig un a gofnodir gan y pedwar efengyllydd – yma gan Mathew, gan Marc 6:30–44; Luc 9:10–17 ac Ioan 6:1–14 – ac y mae rhai gwahaniaethau. Y mae Mathew, Marc a Luc yn dweud fod gan y disgyblion bum torth a dau bysgodyn, ond Ioan yw'r unig un sy'n sôn am Iesu yn gofyn i Philip, 'Ble y gallwn brynu bara i'r rhain gael bwyta?' (Ioan. 6:5). Daw Andreas i'r adwy a dywed, â'i dafod yn ei foch, 'Y mae bachgen yma a phum torth a dau bysgodyn ganddo, ond beth yw hynny rhwng cynifer?' (Ioan. 6:9).

Er bod Iesu'n gweithredu trugaredd trwyfwydo'r dyrfa, yr oedd ganddo reswm arall dros gyflawni'r wyrth, sef rhoi prawf ar ffydd ac ymddiriedaeth ei ddisgyblion ynddo ef ei hun. Y mae'r atebion yn bradychu eu diffyg ffydd ac yn llawn esgusodion. Ateb cyntaf y disgyblion i'r broblem oedd eu danfon i'r pentrefi i brynu bwyd iddynt eu hunain. Pan ddywedodd Iesu wrthynt am roi rhywbeth iddynt i'w fwyta meddent, 'Nid oes gennym yma ond pum torth a dau bysgodyn' (Mathew 14:17). Dywed Ioan wrthym fod Iesu, pan ofynnodd i Philip, 'Ble y gallwn brynu bara i'r rhain gael bwyta?' (In. 6:5), yn rhoi prawf ar y disgybl, 'Dweud hyn yr oedd i roi prawf arno, oherwydd gwyddai ef ei hun beth yr oedd yn mynd i'w wneud' (Ioan. 6:6).

Cymerodd y torthau a'r pysgod, ac wedi diolch rhoddodd hwynt i'r disgyblion, a'r disgyblion i'r tyrfaoedd, a digwyddodd gwyrth. 'Bwytasant oll a chael digon, a chodasant ddeuddeg basgedaid lawn o'r tameidiau oedd dros ben' (Mathew 14:20).



Beth roddodd y bachgen i Iesu? Beth wnaeth Iesu gyda'r bwyd?  
Cafodd llawer iawn o bobl eu bwydo gan Iesu'r diwrnod hwnnw!

Beth am dynnu lluniau llawer o bobl o amgylch y bachgen  
neu gludo lluniau o bobl wedi'u torri o gylchgronau?

Diolch Dduw am y bwyd blasus ac iach rydym yn mwynhau bob dydd. Amen.

# Gwers 32 – Y picnic mawr

**Bara i bawb** | Beibl Newydd y Plant tud. 165

(Ioan 6)



## Gwers 32

Y picnic mawr

### **BEIBL GWEITHGAREDD Y PLANT DAN /DROS 7 oed**

Y picnic mawr tud 32

### **BEIBL LLIW STORI DUW**

Pum torth a dau bysgodyn bach  
tud 243

### **BEIBL BACH STORI DUW**

Llund bol! Tud 244

### **BEIBL NEWYDD Y STORIWR**

Y picnic gwych tud 102

### **BEIBL LLIW Y PLANT**

Porthi'r 5000 tud 228

### **BEIBL NEWYDD Y PLANT**

Iesu'n bwydo llawer o bobl tud 168

### **BEIBL BACH I BLANT**

Y picnic Mawr tud 364

### **Y BEIBL I BLANT MEWN 365 STORïAU**

Y picnic anferth tud 321

### **BEIBL LLIW Y TEULU**

Bwyd i bawb (256) tud 136

## Amser Chwarae

Paratowch bicnic ar flanced gyda phlatiau plastig, cwpanau, rhai bwydydd (gwir neu blastig), teganau meddal. Wrth i chi osod y picnic, siaradwch gyda'r plant am bicnic: A ydych wedi bod ar bicnic? Pwy oedd yno gyda chi? I ble aethoch chi? Beth oedd i'w fwyta? Oedd y dydd yn hwyl?

Mae ein stori heddiw yn sôn am bicnic a baratôdd Iesu i lawer iawn o bobl.

Neu,

## Chwarae Toes

*Bydd angen digon o does i'r plant i gyd.*

Dangoswch i'r plant sut i wneud siapiau pysgod a bara gyda'r toes, ac yna eu rhoi mewn powlenni neu fasedi o bum torth a dau bysgodyn.

Mae stori heddiw yn sôn am Iesu yn defnyddio bara a physgod.

## Amser Stori

Darllenwch yr hanes yn eich geiriau eich hun gan annog y plant i feimio'r stori wrth ei hadrodd.

Rhwbio stumog i ddangos fod y dyrfa'n llwgu, ac edrych yn ddigalon, Iesu'n rhoi diolch i Dduw am y bwyd, rhannu'r bwyd, bwyta'n hapus, casglu'r bwyd a oedd dros ben.

Mi fyddai'r llyfr "Rhannu bwyd i'r miloedd gydag Iesu" yn ddefnyddiol.

Dylid pwysleisio fod y gallu gan Iesu i wneud hyn am ei fod Ef yn arbennig iawn. Ef yw mab Duw, ac mae ganddo'r nerth i wneud pethau sydd yn amhosibl i ni. Roedd Iesu am roi bwyd i'r dyrfa am ei fod ef yn gofalu amdanynt.

## Rhigwm

Diolch i ti am y byd,

(Gwneud siâp cylch yn yr awyr)

Diolch am ein bwyd bob dydd.

(Gwneud ystum bwyta)

Diolch am y gwynt a'r glaw,

(Gwneud ystum glaw yn disgyn, symud yn y gwynt)

Diolch Dduw am bopeth a ddaw.

(Curo dwylo a neidio i fyny ac i lawr)

## Gweddi

Beth am baratoi amrywiaeth o fwyd i ddiolch i Dduw amdanynt?  
Gall y plant ddewis bwyd i ddiolch amdanynt.

## Crefft

Llyfr Crefft, t.189-191

## Adnoddau Ychwanegol

### Crefft

Llyfr Crefftau Stori Duw i blant dan 5 oed t. 189-191

### Gwerslyfrau Golau ar y Gair

Porthi'r Pum Mil

### Tafleini gwefan amserbeibl.org

Cyfres C - Mwy o wyrthiau

### Cyfres DVD Stori Duw

Stori 36: Porthi'r Pum Mil

### Cwis a Chwilair

Llyfr Cwis Cynta i Ateb tud 330

### Cyfres Powerpoints Beibl Bach i Blant

Rhif 45: Y Picnic Mawr

### Llyfrau Stori

Rhannu'r Bwyd i'r miloedd gyda Iesu  
Y Bachgen a roddodd ei fwyd i Iesu  
Pam fod Andreas wedi synnu?

